

O Dujto Poslanie džiko Solunjajna

Džiki crkva ko Solunjajna

1 ¹ O Pavle hem o Silvan hem o Timotej džiki crkva e Solunjanenge ko Devel, amaro Dat hem o Gospodari o Isus Hristos: ² Blagodat tumenge hem mir taro Devel amaro Dat hem o Gospodari o Isus Hristos.

³ Dužna sijem sekogaš te blagodarina e Devleske baši tumenge, phrajljalen, sar soj tano pravo, soske tumari vera bajrola but; hem umnožinelapes o mangipe maškar tumende sekole jeke tumendar, ⁴ agjar so amen korkori falinajamen tumencar maškar e Devleskere crkve baši tumaro trpenie hem vera ko sa tumare progoniba hem muke, so podnesinenalen.

E Hristoskoro ajbe e angelencar ki Pli slava

⁵ Odovaj znako baši o pravedno Devleskoro sudo, za da te računinen tumen dostojna baši e Devleskoro Carstvo, baši kova hem cidena. ⁶ Soske tano pravedno anglo Devel te iranel muka okolenge so mučinenena tumen, ⁷ a tumenge, e mučimenge, lokhipa zaedno amencar, koga ka javinelpes o Gospodari o Isus taro nebo, e angelencar ki Pli sila, ⁸ ko plameno jagakoro, za da te del odmazda okolenge koj na pendžarena e Devle hem koj nae poslušna baši o Evangelie amare Gospodareskoro o Isus Hristos; ⁹ koj ka oven kaznime večno uništibaja dur taro muj e Gospodareskoro hem tari slava Oleskere silatar, ¹⁰ koga ka avel, ko odova Dive, te proslavinelpes ko Ple svetie hem te voshitinenpes Oleske sa o verna, soske tumen poverujngen amare svedoštvoste.

¹¹ Odoleske hem molinajamen sekogaš baši tumenge: amaro Devel te računinel tumen dostojna baši o poziv, hem te ispolninel sekoja šukar vojlja ko šukaripa hem o delo tumare verakoro ki sila, ¹² za da te proslavinelpes o anav amare Gospodareskoro o Isus, ki tumende, hem tumen ki Leste, pali blagodat amare Devleskiri hem o Gospodari o Isus Hristos.

O Manuš e Bezakoneskoro

2 ¹ Molinaja tumen, phrajljalen, uveza baši o ajbe amare Gospodareskoro o Isus Hristos hem baši amaro khediba zaedno ki Leste, ² ma dozvolinen sigate te predomislinen tumen ki tumari godi, nitu te daran ni taro duho, ni taro slovo, ni

taro poslanie, sar te phene tano amendar bičhavdo, sar vekje alo e Gospodareskoro Dive! ³ Nikoj tena hovavel tumen ko bilo savo način, soske odova nae te slučinelpes džikote prvo na avela o periba hem na pojavinelapes o manuš e bezakonieskoro, o čhavo e uništibaskoro, ⁴ koj protivinelape hem vazdelape upreder o sa so vakjerelape Devel ili svetina, agjar so ka bešel e Devleske ko hrami hem ka prestajnelpe pes deka ovi tano Devel.

⁵ Na setinena li tumen deka vakjergjum tumenge akava panda koga sijum sine tumende? ⁶ Hem akana džanena so zadržinelale za da te pojavinelpes ov doprvo ko plo vreme. ⁷ Soske, i tajna e bezakonieskiri vekje delujnela, samo te otstraninelpe taro maškar okova, koj akana zadržinelala, ⁸ hem togaš ka javinelpes o bezakoniko kas o Gospodari ka mudarele Ple zdiveja taro Plo muj hem ka uništinele e pojavaja taro Plo ajba.

⁹ Odovaj tano okova, kaskoro ajbe tano spored o satansko delujbe, sekole silaja, hem čudesno znakoncar hem hovavne čudoncar, ¹⁰ hem sekole nepravdedno hovajbaja, baši okolenge koj merena, soske na priminge o mangipe ko čačipe za da te spasinenpes. ¹¹ Hem odoleske o Devel ka bičhalel lenge uverljivo zabluda, za da te verujnen ko hovajba, ¹² ta te oven osudime sarine, koj na poverujnge ko čačipe, a sinelen zadovolstvo ki nepravda.

Tergjojen cvrsto

¹³ A amen sijem dužna sekogaš te blagodarina e Devleske baši tumenge, phrajljalen, taro Gospodari mangle, soske o Devel izbiringja tumen taro početok baši spasenie, preku osvetuvanje e Duhoskoro hem vera ko čačipe, ¹⁴ ko kova povikujngja tumen preku amaro Evangelie, za da te dobinen i slava amare Gospodareskiri o Isus Hristos. ¹⁵ Togaš, phrajljalen, tergjoven cvrsto hem ikjeren o učenje so siklilenlen amendar, bilo preku slovo ili preku amaro poslanie.

¹⁶ A korkori o Gospodari amaro o Isus Hristos hem o Devel amaro Dat, Koj zamangljamen amen hem dengjamen večno uteha hem šukar nadež pali blagodat, ¹⁷ te utešinel tumare srcia hem te zojrakjerel tumen ko sekova šukar delo hem slovo!

Molinen tumen baši amenge

3 ¹ Najposle, phrajljalen, molinen tumen baši amenge, ta e Gospodareskoro slovo te prastal hem te proslavinelpa sar hem ki tumende, ² hem amenda te oslobodinamen taro rumime hem bilače manuša, soske sarinen naelen vera. ³ Ama verno tano o Gospodari, Koj ka zojrakjereel tumen hem ka zapazinel tumen taro lukavo. ⁴ Uverime sijem ko Gospodari, baši tumenge, deka kjerena hem deka ka kjerena okova so zapovedinaja tumenge. ⁵ A o Gospodari te upravinel tumare srcia ke Devleskoro mangipe hem ko trpenie e Hristoskoro!

Ciden tumen taro neuredno životo

⁶ A tumenge zapovedinaja, phrajljalen, ko anav amare Gospodareskoro o Isus Hristos, te odvojnjen tumen taro sekova phral, koj vodanela neuredno životo, a na palo učenje, so primingen amendar. ⁷ Čače, korkori džanena sar trebela te ugledinen tumen amende, soske amen na vladíngem neuredno maškar tumende, ⁸ nitu halem nekaskoro maro, nego kjergem buti trudoja hem ko napor, i rat hem o dive, za da tena ova ko teret nekasko tumendar. ⁹ Na baši odova so na sineamen pravo ko odova, nego za da te ova korkori amenge baši primer za da te podržinen amen. ¹⁰ Soske hem koga sijem sine tumencar, zapovedíngem tumenge akava: ako nekoj na mangela te kjerel buti, neka hem mate hal!

¹¹ Ustvari, šunaja deka nekoj maškar tumende živinena neuredno, ništo na kjerena buti, nego zalelepe čuče bukjenar. ¹² Asavkenge zapovedinaja hem opomeninajalen ko Gospodari o Isus Hristos te kjerena buti mirno hem te han plo maro. ¹³ A tumenge, phrajljalen, tena dosadinelpa te kjerena šukar!

¹⁴ Ako pak nekoj na šunelale amaro slovo preku o poslanie, obeležinenle hem ma mešinen tumen oleja, za da te ladžal. ¹⁵ Ama ma računinenle baši neprijateli, nego predupredinenle sar phral.

O posledna pozdravia

¹⁶ A korkori o Gospodari e mireskoro te del tumen mir sekogaš hem ko sekova način. O Gospodari te ovel sarinencar tumencar!

¹⁷ Pozdrav mle vasteja, e Pavleskoro: odovaj tano belego ko sekova poslanie, pišínava agjar: ¹⁸ i blagodat amare Gospodareskiri o Isus Hristos te ovel sarinencar tumencar.